


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-28	Al-Qashash	88	9	Makkiyyah	Ke-49	9



Zaman Diturunkan

1. Surah al-Qashash diturunkan selepas Surah as-Syu'ara' dan an-Naml di peringkat ketiga kehidupan Rasulullah s.a.w. di Mekah antara tahun ke-6 hingga ke-10 Kenabian, ketika itu pemimpin-pemimpin kafir Quraisy diminta mengambil i'tibar dan pengajaran daripada akibat buruk yang telah menimpa Fir'aun, Haman dan Qarun. Rasulullah s.a.w. dilarang daripada menjadi penolong dan penyokong penjenayah-penjenayah dari kalangan kafir Quraisy.
2. Ayat ke-52 **أَنْتَ لَا تَهْدِي مَنْ أَحْبَبْتَ** turun pada bulan Rejab 10 Hijrah, tidak lama sebelum Abu Thalib meninggal dunia.

Perkaitan Surah Al-Qashash Dengan Surah Sebelum Dan Selepasnya

1. Di dalam Surah an-Naml yang lalu telah dikemukakan sikap positif raja perempuan negeri Saba' kerana telah menerima seruan tauhid dan memeluk agama Islam dengan sukarela, sedangkan beliau sebelumnya adalah pemuja matahari. Di dalam Surah al-Qashash ini pula disebutkan sikap negatif Fir'aun, Haman, Qarun dan bala tentera di bawah pimpinan mereka. Mereka diingatkan supaya mengambil i'tibar daripada peristiwa orang-orang yang telah dibinasakan.

Beberapa Kata Kunci Dan Tema Utama Surah

1. **عُلُوٌّ فِي الْأَرْضِ** (Bermaharajalela di bumi) adalah satu istilah khusus di dalam al-Qu'ran.

Ia dikhususkan untuk pemerintah-pemerintah dan penguasa-penguasa yang sombong dan zalim. Penguasa-penguasa dan pemerintah-pemerintah yang tidak takut kepada tuhan, tidak menghiraukan tuhan bahkan cuba menjadi tuhan dengan merampas kuasa yang khusus dengan Allah dan menggunakannya dengan sewenang-wenang. **عُلُوٌّ فِي الْأَرْضِ** juga merupakan mesej utama surah ini.

- (a) Di permulaan surah ini, setelah mengemukakan kesalahan dan jenayah yang dilakukan Fir'aun di zamannya, dia dikatakan telah bermaharajalela di bumi **عُلُوٌّ فِي الْأَرْضِ** (Ayat: 4).

إِنَّ فِرْعَوْنَ عَلَا فِي الْأَرْضِ

- (b) Di penghujung surah juga dikatakan **عُلُوٌّ فِي الْأَرْضِ** (bermaharajalela di bumi) merupakan salah satu sebab utama manusia dibinasakan di dunia dan tidak mendapat syurga di akhirat nanti (Ayat: 3).

وَلَكَ الدَّارُ الْآخِرَةُ نَجْعَلُهَا لِلَّذِينَ لَا يُرِيدُونَ عُلُوًّا فِي الْأَرْضِ وَلَا فَسَادًا وَالْعَاقِبَةُ لِلْمُتَّقِينَ ﴿٨٣﴾

- (c) Perkataan **الْمُتَّقِينَ** yang digunakan di dalam ayat ke-83 secara khusus bererti pemerintah-pemerintah yang menjadi khalifah Allah di bumi dengan melaksanakan hukum-hakam Allah dan berada dalam batas-batas dan ikatan syari'at Allah. Mereka menggunakan kuasa dengan berhati-hati supaya tidak melanggar perintah Allah, mereka juga mengelak diri daripada berlakunya kerosakan di muka bumi

kerana penyalahgunaan kuasa.

(d) Rangkaian kata **عُلُوٌّ فِي الْأَرْضِ** tersebut di permulaan surah ini dan juga di penghujungnya, ini juga termasuk dalam salah satu gaya bahasa al-Qur'an yang unik. Di permulaan ia dikemukakan sebagai pendahuluan, sebelum sampai ke penghujung diberikan perincian tentangnya dan akhirnya ia diulangi sebagai penutup dan peringatan.

2. **إِسْتِكْبَارٌ فِي الْأَرْضِ** juga merupakan satu istilah khusus al-Qur'an.

Ia bererti sikap dan jiwa manusia yang derhaka dan melanggar batas-batas agama sehingga apa yang tersimpan di dalam hatinya terkeluar dan memberi kesan kepada orang-orang lain yang berada di muka bumi. Fir'aun dan bala tenteranya telah berlagak sombong dan menderhakai Allah di negeri yang diperintahnya (Ayat: 39).

وَأَسْتَكْبَرُوا وَجُنُودُهُ فِي الْأَرْضِ بِغَيْرِ الْحَقِّ

Perkataan **جُنُودٌ** dalam ayat ini juga perlu diberikan perhatian khusus, sikap **إِسْتِكْبَارٌ** bukan hanya terbatas kepada individu sahaja, bahkan ia mencerminkan jiwa dan mentaliti keseluruhan tentera yang dipimpin oleh komandernya. Kemabukan kuasa tentera seringkali membuatkan manusia dihina dan diperhamba.

3. Fir'aun dan bala tenteranya serta kakitangan kerajaannya disebutkan sebagai **مَلَأَ**.

Al-Qur'an mengatakan mereka adalah orang-orang yang jahat, derhaka dan perosak (Ayat: 32).

إِنَّهُمْ كَانُوا قَوْمًا فَاسِقِينَ ﴿٣٢﴾

4. Di dalam Surah al-Qashash dinyatakan perbezaan di antara dua macam kepimpinan.

Kata jama' bagi **إِمَامٌ** ialah **أَيُّمَةٌ**, pemimpin-pemimpin dan ketua masyarakat boleh jadi ahli syurga, boleh jadi juga ahli neraka.

(a) Kepimpinan Nabi Musa dan Harun adalah kepimpinan yang baik, Allah menghendaki Bani Israil yang sebelum itu tertindas, lemah dan dianiayai dibela untuk menjadikan mereka sebagai pemimpin-pemimpin dunia. Di dalam ayat ke-5 dikatakan:

وَنُرِيدُ أَنْ نَمُنَّ عَلَى الَّذِينَ اسْتُضْعِفُوا فِي الْأَرْضِ وَنَجْعَلَهُمْ أَئِمَّةً وَنَجْعَلَهُمُ الْوَارِثِينَ ﴿٥﴾

(b). Kepimpinan Fir'aun pula sebaliknya, ia adalah kepimpinan yang menyeru manusia ke neraka, satu kepimpinan yang jahat dan perosak. Kerana kesombongan dan kederhakaan mereka, Allah telah menjadikan mereka ketua-ketua yang menyeru manusia ke neraka. (Ayat: 41).

وَجَعَلْنَاهُمْ أَئِمَّةً يَدْعُونَ إِلَى النَّارِ

5. Di dalam Surah al-Qashash, perkataan **جُنُودٌ** dan **جُنُودُهُمَا** diulang sebanyak dua kali.

Daripada kata جُنُودَهُمَا dapat difahami bahawa Fir'aun dan Haman merupakan dua orang pemimpin tentera, Fir'aun sebagai ketua dan presiden merangkap panglima agung negara, Haman pula perdana menteri merangkap menteri pertahanan atau timbalan ketua tentera.

(a) Allah menghendaki Fir'aun dan Haman serta bala tentera kedua mereka menyaksikan akibat buruk yang dibimbangi mereka (Ayat: 6).

وَنُرِيْ فِرْعَوْنَ وَهَامَانَ وَجُنُودَهُمَا مِنْهُمَا مَا كَانُوْا يَحْذَرُوْنَ ﴿٦﴾

(b) Allah s.w.t. telah menyebutkan bala tentera Fir'aun dan Haman sebagai خَاطِئِينَ (orang-orang yang bersalah) (Ayat: 8).

إِنَّ فِرْعَوْنَ وَهَامَانَ وَجُنُودَهُمَا كَانُوْا خَاطِئِينَ ﴿٨﴾

(c) Fir'aun dan bala tenteranya bersikap sombong dan zalim tanpa sebarang hak dan kelayakan (Ayat: 39).

وَأَسْتَكْبَرَ هُوَ وَجُنُودُهُ فِي الْأَرْضِ بِغَيْرِ الْحَقِّ

(d) Allah s.w.t. telah menghukum Fir'aun dan juga bala tenteranya dengan menenggelamkan mereka di dalam laut (Ayat: 40).

فَأَخَذَتْهُ وَجُنُودُهُ قَتَبَاتُكُمُ فِي الْيَمِّ

6. Di dalam Surah al-Qashash, perkataan إله dipakai dengan erti pemerintah yang mempunyai kuasa mutlaq.

Fir'aun telah menda'wa telah mempunyai kuasa itu, dia juga telah menda'wa telah mempunyai sifat rububiyah, kerana itulah dia berkata أَنَا رَبُّكُمُ الْأَعْلَى sedangkan dia sendiri adalah seorang penyembah banyak tuhan, dia sebenarnya seorang pemimpin musyrik dan diktator.

(a) Dia berkata kepada pemimpin-pemimpin tenteranya: "Aku tidak mengetahui kamu mempunyai ilaah (pemimpin yang mempunyai kuasa mutlaq) selain aku". (Ayat: 38).

وَقَالَ فِرْعَوْنُ يَأْتِيْهَا الْمَلَأُ مَا عَلِمْتُ لَكُم مِّنْ إِلَهِ غَيْرِيْ

(b) Di dalam ayat ke-71, perkataan ilaah telah digunakan untuk tuhan yang mempunyai kuasa mutlaq dan yang layak disembah, tuhan yang menyediakan cahaya untuk manusia (Ayat: 71).

مَنْ إِلَهِ غَيْرَ اللَّهِ يَأْتِيْكُمْ بِضِيَآءٍ

(c) Di dalam ayat ke-72 pula, perkataan ilaah digunakan untuk tuhan yang Maha kuat dan layak disembah, tuhan yang menyediakan malam untuk manusia bertenang (Ayat: 72).

مَنْ إِلَهَ غَيْرُ اللَّهِ يَأْتِيكُمْ بَلِيلٌ تَسْكُنُونَ فِيهِ

7. Di dalam Surah al-Qashash, pecahan perkataan اِهْلَاكَ beberapa kali digunakan.

(a) Nabi Musa telah diberikan kitab Taurat 1,300 tahun sebelum Masihi. Di dalam kitab Taurat, kisah bangsa-bangsa yang dibinasakan Allah seperti kaum Nuh, kaum 'Aad, kaum Tsamud, kaum Luth dan juga kaum Syu'aib disebutkan (Ayat: 43).

وَلَقَدْ آتَيْنَا مُوسَى الْكِتَابَ مِنْ بَعْدِ مَا أَهْلَكْنَا الْقُرُونَ الْأُولَى

(b) Alangkah banyak bangsa-bangsa yang bangga dengan kehidupan mereka dan megah dengan kemewahan ekonomi dan gaya hidup mereka telah dibinasakan oleh Allah. Ia boleh dijadikan sebagai i'tibar oleh bangsa-bangsa kaya dan mewah yang hidup di abad ke-21 ini dan golongan materialis hingga ke hari kiamat (Ayat: 58).

وَكَمْ أَهْلَكْنَا مِنْ قَرْيَةٍ بَطَرَتْ مَعِيشَتَهَا

(c) Dua prinsip telah disebutkan berkaitan dengan bangsa-bangsa yang dibinasakan. Prinsip pertama ialah bangsa-bangsa tidak dibinasakan sebelum diutuskan rasul dan sebelum sempurna seruan rasul dan hujjah dari pihaknya kepada mereka. (Ayat: 59).

وَمَا كَانَ رَبُّكَ مُهْلِكَ الْقُرَى حَتَّى يَبْعَثَ فِي أُمِّهَا رَسُولًا يَتْلُوا عَلَيْهِمْ ءَايَاتِنَا

Prinsip yang kedua ialah Allah tidak membinasakan negeri-negeri yang dihuni oleh orang-orang yang shaleh dan baik-baik, yang dibinasakan Allah ialah negeri-negeri yang dihuni oleh orang-orang yang zalim (Ayat: 59).

وَمَا كُنَّا مُهْلِكِي الْقُرَى إِلَّا وَأَهْلُهَا ظَالِمُونَ ﴿٥٩﴾

(d) Orang kanan Fir'aun; Qarun adalah seorang kapitalis Yahudi, dia beranggapan kekayaan yang ada padanya semata-mata kerana ilmu dan kebijaksanaannya, sedangkan sejarah menjadi saksi bahawa Allah telah membinasakan penjenayah-penjenayah dan orang-orang yang berdosa yang lebih banyak ilmu, lebih kuat dan lebih berpengaruh lagi daripadanya (Ayat: 78).

قَالَ إِنَّمَا أُوتِيتُهُ عَلَىٰ عِلْمٍ عِنْدِي ۖ أَوَلَمْ يَعْلَم أَنَّ اللَّهَ قَدْ أَهْلَكَ مِنْ قَبْلِهِ مِنَ الْقُرُونِ مَنْ هُوَ أَشَدُّ مِنْهُ قُوَّةً وَأَكْثَرُ جَمْعًا وَلَا يُسْرِعُ عَنْ

ذُنُوبِهِمُ الْمُجْرِمُونَ ﴿٧٨﴾

(e) Allah telah menenggelamkan ke dalam perut bumi Qarun bersama rumah dan harta kekayaannya, tidak ada satu pun kuasa dan penolong selain Allah yang telah dapat menyelamatkannya (Ayat: 81).

فَخَسَفْنَا بِهِ وَبِدَارِهِ الْأَرْضَ فَمَا كَانَ لَهُ مِنْ فِئَةٍ يَنْصُرُونَهُ مِنْ دُونِ اللَّهِ وَمَا كَانَ مِنَ الْمُنْتَصِرِينَ ﴿٨٨﴾

(f) Di akhir Surah al-Qashash terdapat ayat yang menyeru pemimpin-pemimpin dunia supaya menerima tauhid doa, tauhid kekuasaan, tauhid kehidupan dan tauhid tasyri', semuanya diperjelaskan secara terperinci di dalam ayat itu. Pemimpin-pemimpin yang tidak menghiraukannya mungkin dihukum di dalam dunia dan tentu sekali akan dihukum di akhirat nanti. Semua makhluk akan fana dan binasa, hanya Allah sahaja yang kekal. Oleh itu manusia janganlah menyeru dan berdoa kepada selainNya dan jangan juga menerima orang lain sebagai hakim dan pembuat undang-undang untuknya, manusia hendaklah sentiasa ingat bahawa ia akan dikembalikan kepadaNya (Ayat: 88).

وَلَا تَدْعُ مَعَ اللَّهِ إِلَهًا آخَرَ لَا إِلَهَ إِلَّا هُوَ كُلُّ شَيْءٍ هَالِكٌ إِلَّا وَجْهَهُ لَهُ الْحُكْمُ وَإِلَيْهِ تُرْجَعُونَ ﴿٨٩﴾

8. Perkataan ظهير (penolong atau pembantu) dua kali digunakan di dalam surah ini.

Daripada kedua-dua ayat yang mengandungi perkataan ini difahami bahawa hamba-hamba Allah yang baik-baik janganlah sekali-kali menjadi pembantu dan penyokong orang-orang kafir dan orang-orang yang zalim. Jika tanpa disedari berlaku perbuatan seperti itu daripada mereka, mereka diperintah supaya beristighfar dan meminta ampun kepada Allah disamping berjanji untuk tidak lagi menyokong dan membela orang-orang yang zalim, fasiq dan kafir. Sama ada mereka terdiri daripada keluarga tersayangnyanya sendiri terutamanya orang-orang yang mempunyai pemikiran dan mentaliti Fir'aun.

(a) Nabi Musa telah beristighfar kerana pembunuhan tidak sengaja yang telah berlaku daripadanya, Allah telah memaafkannya. Sebagai menghargai keampunan Allah itu, Nabi Musa berjanji untuk tidak menolong dan membantu lagi orang-orang yang berdosa (Ayat: 17).

قَالَ رَبِّ بِمَا أَنْعَمْتَ عَلَيَّ فَلَنْ أَكُونَ ظَهِيرًا لِلْمُجْرِمِينَ ﴿١٧﴾

(b) Allah s.w.t. telah mengatakan wahyu yang diberikan kepada rasul terakhirNya adalah rahmat, diperjelaskan kepada dunia bahawa Rasulullah tidak bercita-cita dan berhasrat hendak memegang jawatan kerasulan dan kenabian. Bagaimanapun setelah diberikan wahyu kepada baginda, Allah telah berpesan kepadanya supaya jangan sekali-kali menyokong dan membantu orang-orang kafir (Ayat: 86).

وَمَا كُنْتَ تَرْجُو أَنْ يُلْقَىٰ إِلَيْكَ الْكِتَابُ إِلَّا رَحْمَةً مِنْ رَبِّكَ فَلَا تَكُونَنَّ ظَهِيرًا لِلْكَافِرِينَ ﴿٨٦﴾